



Il vicediretcur digl Uffeci federal per energia Daniel Büchel.



Andrea Fanzun durant il workshop cun student(a)s.

FOTOS H. HUONDER

## «Stabilitas in progressu» era ella politica e l'economia

La claustra da Mustér ha purschiu la sonda vargada ina roscha interessantas scuntradas e discussiuns

DA HANS HUONDER / ANR

■ Il motto dalla claustra da Mustér pil giubileum da 1400 onns «stabilitas in progressu» ei staus la sonda vargada il patratg fundamental per ina lunga retscha da workshops. En stanzas da scola dil gimnasi han anteriuras studentas ed anteriurs students presentau ils pli differents temas dil mintgadi e fatg la parallela tier la stabilitad ed il progress. La fin d'jamna passada ei la claustra da Mustér daventada ina «fabbrica da patratgs». Schegie ch'ella ademplescha permanentamein quella funcziun eis ella sesaviarta il venderdis e la sonda per patratgs, ideas, inspiraziuns, impuls e ponderaziuns d'ordeifer. En connex cun biebein 20 workshops han ils responsabels dil gimnasi dau a studentas e students da pli baul la caschun da presentar lur optica persunala dil motto da giubileum «stabilitas in progressu» ord vesta da lur engaschament professiunal. Enteifer quels luvratoris ei vegniu discussiunau arisguard ils pli differents secturs dil mintgadi naven dalla medischna en-

tochen las medias, dils problems che se-dattan il mument sil sectur dall'energia entochen ils basegns dils museums ni era dallas experienschas persunalas da medis ni las visiuns dil svilup. L'Agentura da novitads rumantscha ha visitau dus workshops, numnadamein quel dil vicediretcur digl Uffeci federal per energia, Daniel Büchel e quel digl inschignier Andrea Fanzun.

### «Stabilitas» tier l'energia?

Il provediment dall'energia en Svizra ei stabils. Quei san ins denton buca pretender dils prezis per quella. Fertion ch'il consumet paga pli u meins il prezi dils onns vargai avon ils emprems patratgs dalla midada d'energia, sentan las ovras – cunzun hidraulicas – il squetsch sils prezis sin fundament dall'energia importada. «Quei squetsch ha da far ton sco nuot cun igl effect da Fukushima, pertgei las ovras atomaras ein aunc adina en funcziun. Auter fuss quei sch'ellas fussen vegnidas sclausas immediatamein», puntuescha Daniel Büchel che ha fatg la matura a Mustér igl

onn 1991. Tenor el persequitescha la Svizra ina politica che tegn quen oravontut dalla stabilitad dil provediment d'energia, senza piarder la vesta sils criteris dalla fiera. Concernent las subvenziuns per ovras pintgas puntuescha Daniel Büchel: «Il sustegn da quellas se-basa sin indrezs da referenza. La finamira da quellas subvenziuns ei buca da procurar per ina gronda produziun il mument, mobein da procurar che quellas ovras ein in mument concurrenzablas.» Daniel Büchel, ch'ei staus engaschauer era sco cussegliader persunal da cussegliera federal Joseph Deiss e da cussegliera federala Doris Leuthard, constatescha che la confederaziun dispona da glieud cun buna savida dil fatg, era sil sectur dall'energia: «Magari vegn ei forsa luvrau empau plaun, mo la fin finala ei il resultat decisivs. Ils uffecis han buc adina sempel, pertgei la politica vul veser ina ga ni l'autra las caussas auter che quei ch'ellas ein, buc il davos era sch'ei va per vegnir reeligiun.» Ina gronda sfida el senn d'in «progressu» ei il svilup dallas pusseivladads da conservar egl

avegnir l'energia per saver nezegiar quella tenor basegns.

### Nua ein ils inschigniers?

«En Svizra mauncan il mument 4400 specialists pil sectur d'inschignier d'electro e maschinas, 3700 per l'informatica e 4200 per la construcziun, mesiraziun ed architectura», constatescha Andrea Fanzun che meina a Cuera sco era a Scuol, Samedan, Arosa e Turitg in biro d'inschignier cun partenaris. Ils motivs persunter ein da differenta natira e quei malgrad ch'il basegns per inschigniers crescha ad in crescer: «Treis quartas dils inschigniers che bandunan lur studi luvuran silsunter sin auters secturs, sco per exempel finanzas. Leu ein els pagai meglier che per exempel sil sectur dalla construcziun. Ultra da quei sescoleschan aunc oz fetg paucas dunnas sco inschignieras.» Tenor Andrea Fanzun che ha fatg la matura a Mustér igl onn 1984 stuess igl interess pils fatgs dalla construcziun e dil svilup vegnir svegliaus gia tier ils affons: «Praticamein mintga buob fa termagls cun legos, mo banduna sil-

sunter quella direziun che pretenda era inschign e creativad.» El rom dil workshop cun rodund 15 persunas ein solu-zions per ina migliur dalla situaziun vegnidas discussiunadas. Denter auter ei vegniu constatau che la scola media – probablamein buca mo il gimnasi a Mustér – promovia memia pauc las qualitats e l'instrucziun tecnica. A Mustér savessi quei per exempel succeder en cooperaziun cun la Distec SA, in menaschi che lavura sil sectur dil svilup e la construcziun da cumponents. Studentas e students stuessien vegnir confruntai pli stedi cun materia tecnica, per exempel era en connex cun workshops, jamnas da project ni visetas da menaschis. Plinavon stuessi la lavur publica dallas gruppas professiunalas dils inschigniers esser megliera ed aschia era la preschientscha els mieds da massa. Generalmeim vegn numnadamein constatau che piazzas da lavur en quella direziun vegnan spustadas pli e pli egl'exteriur. Il prighel che la Svizra daventi in plaz sulettamein per prestaziuns da survetsch ei gronds. Quei ei in svilup malsegir per l'economia.



Fetg bia glieud ha assistiu la dumengia alla fiasta per s. Placi e s. Sigisbert dalla claustra a Mustér. La processiuon ei ida a fin sin la nova piazza avon la porta principala dalla claustra.



Ina bellezia processiuon cun delegaziuns dallas vischnaucas dalla Cadi e biars representants dalla baselgia e dalla politica d'ordeifer.